

Landabengo Seateko 500 bat langile erregulazioan hasiko dira ekainean

Enpresako zuzendaritza 700 langileko soberakina aztertzen ari da

Iruñeko Seatek 500 langile enplegu erregulazioan jarriko ditu datorren ekainean, gaueko lan txanda bertan behera utziz, ibilgailu ekoizpena gutxitzeko helburuz. 'Polo' ibilgailu mota berriaren produkzioari ekiteko, berriz, 700 langile kentzea aztertzen ari da enpresako zuzendaritza.


IRUÑA

Seat-landabeneko zuzendaritzak enplegu erregulazio hau indarrean jartzeko asmoa agertu die UGT, CCOO eta LAB sindikatuak, ibilgailu salmentaren beherakada dela eta Alemaniako Volkswagengentzat agintariek hala aginduta.

Konpainiako nagusiek emandako aginduen arabera, lantegi honen produkzioa 16.000 ale gehiagotan gutxitu behar da. Ondorioz, aurrikusitako ibilgailu produkzioa 192.300 alera jaitsi da aurtun. Horietatik, 124.000 lehen seihilabetekoan aterako dira eta gainontzeko 68.300 urteko azken lauhilekoan.

Produkzioa aurrikuspen hauetara egokitzeko, enpresako zuzendaritzak gaueko lan txanda kentzea erabaki dute. Honela, gaur egun faktoria honek egunean ekoizten dituen 120 ibilgailuak gutxitu egingo dira hementik aurrera.

Automobilgintzari gogor eragiten dion krisiaren ondorioz etengabeko erregulazioak aplikatzen ari da Landabengo Seat aurtun: urtarrilean 300 langile erregulazioan hasi ziren eta martxoan beste 300. Langile guzti hauek behin-behinekoak dira eta



Muntaia katea Landabengo Seaten.

A. BAYO

enpresak berriro kontratatzeko konpromezua hartu du.

Oraingo espedientearen enpresak proposatutakoaren arabera, hirugarren lan urtea betetzen duten behin-behineko langileei kontratua hautsi egingo zaie, urtebete barru berriz ere kontratu finkoz hartzekotan. Egoera honetan 352 langile daudenez, 500 osatu arte erregulazioan sartuko diren gainontzeko 200 langileak finkoak izango dira. Erregulazio honek 1994eko ekainean 'Polo' motako ibilgailu berria merkaturatu arte iraungo du.

Hala ere, kotxe berri hau fa-

brikatzeko langile beharra gutxitu egingo dela ohartarazi dute zuzendariak. Faktorian 4.974 langilek dihardute gaur egun (2.970 finko eta 2.004 behin-behineko), eta auto berria egiteko 4.672 behar zirela uste zen hasieran, beraz, 300 pertsona soberan zeuden.

Nagusien asmoa langile soberakina aurrejubilazioen eta baje bidez kentzea da. Prebisio horiek murriztu egin dira orain 4.280 langile izateraino. Ondorioz, Iruñeko lantegian ia 700 langile kentzeko aukera aztertzen ari dira Seateko buruak.

Eki Alemaniako metal sektoreko greba amaitutzat jo dute akordioa sinatuta

BONN

Alemaniako ekialdeko metal sektoreko langileek hiru astez egin duten greba bertan behera uztea erabaki dute, mendebaldeko soldatekin parekatzeko epea luzatzea patronalarekin hitzartu ondoren.

Sajoniako langileak atzo bertan hasi ziren lanean, % 77tik gorako gehiengoak hala erabakita. Astearte gauean iritsi zuten akordioa Berlin-Brandenburg estatuko sindikatuak eta patronalak, Alemania Demokratiko ohian Sajoniako hitzarmenarekin bat egiteko falta zen *lander* bakarra, alegia.

Altzairugintza sektorean ez da, ordea, akordiorik lortu eta

negozialetak etenda daudenez Eki Alemaniako greban jarraituko dute azpisektore honetako behar-ginek.

Sinatutako konpromezuaren arabera, ekialde eta mendebaldeko metalgintzako soldatak gutxinaka berdinduz joango dira 1996. urtean prozesua burutzeko. Horrela, % 26ko lehen soldata igoera datorren abenduan izango dute ekialdeko metalgintzako langileek.

**SOLDATA
TXIKIAGOAK
AUKERAN**

Hiru asteko greba patronalak 1991n sinatutako akordioa apurtu zuelako gertatu da. Baliorik gabe gelditu den akordioa honek jasotzen zuenez, % 26ko soldata igoera joan den

apirilean izan beharko lukete Eki Alemaniako behar-ginek, eta berdinketa prozesua datorren urtean burutu.

Sajonian eta Eki Alemaniako beste lau estatu federatuetan lortutako akordioak baldintza bereziak ezartzen die «porrotaren atarian» dauden metalgintza enpresei eta hitzarmen kolektiboan jasotakoak baino soldata apalagoak eskaintzeko aukera ematen die.

Lau milioi afiliaturekin Europako sindikatu handiena den IG-Metall eta sektoreko patronalak adostu duten akordioaren arabera 1993. urtearen bukaerarako ekialdeko soldatak mendebaldekoen % 80 izatera helduko dira.

Administrazioko ELA eta LABek ertzainen jokaera salatu dute

GASTEIZ

Eusko Jaurlaritzak Lakuan duen egoitzaren aurrean manifestaldia egiten ari ziren Gasteizko Administrazioako langileen aurka jo zuen Ertzaintzak atzo eta ekintza honengatik ELA eta LAB sindikatuak euren gaitzespena agertu zuten.

HABE, IAT/ITV eta osasun zuzendaritzako langileak bildu zituen manifestaldiak, dauzkaten lan arazoak salatzeko, batez ere zerbitzu publikoen pribatizazioak ekarriko dituenak.

ELA eta LABen arabera, euskal Administrazio publikoko langileen kontzentrazioa baketsua izan arren, «eraso fisiko eta hitzekoen bitartez» zapuztu zuen Ertzaintzak.

Bi sindikatu abertzaleen esanetan «Gasteizko Gobernuak aurrera daraman politika diktatoriala isladatzen du langileei egin zaien eraso bortitzak eta horrela erantzuten zaie arazoak konpontzeko sindikatuen negoziaketa eskerei».

LABek bere ordezkari batek jaso zuen «eraso basatia» salatu zuen eta poliziaren ekintza hau «sindikatuak kideek pairatzen duten ohizko jarraikipenean» kokatu zuen.

Gasteizko Gobernuaren «politika historikoa eta sindikatuen aurkakoa» salatu zuen LABek.

**DIPUTAZIOKO
LANGILEAK
KALERATU**

Era berean ELAk herenegun Bizkaiko Diputazioan itxita zeuden sindikatuak ordezkariak Ertzaintzak kaleratu zituela salatu zuen atzo.

Foru erakundeko funtzionarioek Arce pafe 93 hitzarmenaren alde egin zuten itxialdia. Hereneguneko gertakariengatik Ignacio Etxebarria Lehendakaritza diputatu bizkaitarraren dimisioa eskatu du ELAk.

Bizkaiko Diputazioko itxialdia zenbait udaletxetan ere egin dute hiru egunez ELAko ordezkariak. Hitzarmenaren aldeko protesta ekintza hauek atzo bukatu ziren Abantoko udaletxearen aurrean egindako kanpadarekin.

Udal eta diputazioetako langileek sektoreko hitzarmena negoziatzea, udal bakoitzak bere akordioa izatea, sindikatuak aurkeztutako eskari plataformei erantzuna ematea, Elkarkidetzako kuota ordaintzea eta osasun zerbitzuak bakoitzaren nahien arabera mantentzea eskatzen dute.

Petronorreko 107 langileren enplegua erregulatzeko plana

BILBO

Petroleos del Norte S.A. (Petronor) enpresak 107 langileren enplegua erregulatzeko espedienteak aurkeztu du aste honetan Lan Agintaritzan, «ezinbesteko arrazoiak» argudiatuz. Enpresa batzordeak, berriz, idazki bat zuzendu zuen atzo Eusko Jaurlaritzako Lan Sailera, erregulazio espediente hau aintzat hartu ez dezala eskatuz.

Espedientearen ezinbesteko arrazoiak Petronorren birfindegiko tximinia batean gertatutako leherketa bat da, zuzendaritzaren txostenean ageri denez.

Hala ere, bertako langileek iragan martxoaren 24etik aurrera hitzarmen kolektiboaren alde eginiko hiru grebaldiek ere zerikusia izan lezaketela susmatzen dute, enplegu erregulazioa enpresaren mendeku antzeko neurria izan litekeela, alegia.

Espedienteak aurkeztetakoan, enpresak «Petronorren etorkizuna eta bideragarritasun ekonomikoa bermatzea» argudiatu zuen.

Bizkaiko konpainia hone-

tako zuzendaritza kezkatuta azaldu zen, lanuzteen ondorioz «balio handiko instalazioei kalteak» eragin zaizkietako. Kalte hauetariko bat Muskizko birfindegiko tximinian gertatutako leherketa izan zitekeela uste du zuzendaritzak.

Langileen idazkian esaten denez, ordea, leherketa horrek ez du zerikusirik izan aurrean izandako grebaldiekin eta benetako arrazoiak «instalazioak martxan jartzerakoan segurtasun neurriak ez hartzea» izan ziren. Horregatik, «arrazoiak ez dira ezinbestekoak izan, baizik eta arduragabekeria: zuzendaritzak kontuz jokatu izan balu istripu hau ez zen gertatuko» diote.

Petronorreko enpresa batzordeak ziurtatzen eman du, bestalde, instalazioak konpontzeko lantegiko pertsonala beharrezkoa izango dela.

Horrez gain, lanpostuak erregulatu beharrean, instalazioen konponketak dirauen artean kalteak jaso dituzten instalazioetan lanean dabil-tzan 125 behar-ginek formaketan jardutea ere proposatu du.